

# Judasĩ hatu kene bumanikiaki

## JUDAS

---

### Judasĩ hatukiri xinānikiaki, na hātcharā

<sup>1</sup>Tsuabura Epa Deus matuwē nuikī matu kenatā katuni mā habu Jesus Cristō matu tsumashū mekekubainai ē Tiagō betsa Judas Jesus Cristō tsumapā, ē hātxa ē matu bumai uīrakāwē, <sup>2</sup>Deus matuwē nuikī unānuma matu hiwemakī hau ana matu duahairawakubainūwē.

### Yusĩ parananāmisbu Deusū hatu kupishanikiaki, na hātcharā

<sup>3</sup>Ē betsabū inū ē puibuū, matuwē nuikī haska Jesus Cristō matu inū ea nuku pashawakatsi hātchanikiri matu keneshūkatsi ibiakī ha akama eskaibukiri hatu uīkī habukiri xināki Deusū kakape nū matu Deusunabuwakī yusīni habū betsa wakī matu bika tenemakī inū yura betsabū hau hatu parāyamarianūbū mā hatu nemakubainū haskakiri keneshū ē matu bumai uīrakāwē. <sup>4</sup>Ha inū, ha bebūkiri ha yurabukiri Deusū hawē hātxa hatu kenemani habu parananāmisbu kupinūbariai habias yuini keska na habiatiā yurabu betsa betsapa hune txakabu hayabia matube itxai unātinātā hatū txakabu henekatsi ikama habū xināwē matu parākī yuikī: “Deus pepatunā, hawara txakabu mā wabiaya matū txakabu buatā kupiama ishanikiki”, akī hamapai atimapa matu yusī hatū hiwea pewai beshtekekatsi ikama Jesus Cristo besti nukū Shanē Ibubiakē hawē kuxipa danākanikiki.

### Deusū hatu unāti watā kupinūbarikiaki, na hātcharā

<sup>5</sup>Egito anua Israelbu Deusū hatu tashnimabirani mā unābiaya haskakiri mā xinānūbū ana matu yuinū nīkakāwē. Ma hatu pashawabaiama Israelbu habū Deusū hātxa ikūwākatsi ikama danaībuwē taeshū hanu tsua hiweabumanushū Yavé Deusū hatu kupikī tenākubirani mā unaiī. <sup>6</sup>Ha dikabi Deusū hawē nai tsumabu nai anua habu tibi ha mekei hanu hau shanē ibunūbū hatu yunubia haska besti mekekatsi ikama hatū daya

henebiranaibu Deusū hatu nemakī hanu mexuhaira kaīkaītirumanu hatu bitxitā hanu bari hawē heneai anu hatu kupiaitiā haburi kupishanai hatu mekea mapuabuki. <sup>7</sup>Ha hawē nai tsumabu hatu ashanai keskari wakī nawabu Sodoma inū Gomorra mae ewapa inū hatu dapi mae urama anu hiweabu txutawē kemukī hunibu habe hunibe txutanameaibu Deusū hatu kupikī hawē yusīa danaibu txi nukaismawē hatu kupishanai keska wakī shabakabi Sodoma inū Gomorra hatu kupinikiaki, habias nukubūri dasibibū hatuwē taeshū nū unāshanūbū hatu kupikinā.

<sup>8</sup>Hatu haska wani xinābiai ha paranānāmisbū shabakabi xinaī hiweama yuikī: “Deusū ea hari yusīkiki”, iki hatū xinā meribiswē hātchai yurawē besti kemui txutanamekī Deus shanē ibuai itxakī danākī Deusū nai tsuma kuxipaburi ha amisbuki. <sup>9</sup>Hakia Deusū nai tsuma shanē ibu Miguel dasibi nai tsuma betsabu binuhaira Satanásbe hātchai Moisés mawa hawē yura haratutūra hawena watiru yauxi ha irabenamekī Miguel hātcha pepawē besti hātcha wakī Satanás yuikī: “Yavé Deusū hau mia txitenūwē”, ibianikē <sup>10</sup>hawara unākī nīkabuma ha paranānāmisbu yupukunākubaīmisbuki. Haska hatū xinānā, yuinakapā xināyā keskabuki. Hatū xinā txakabuwē taearā, hatūmebi hatū kupiti bikanikiki.

<sup>11</sup>Uīa. Habu ikirā, Caim hawē betsa tenāni keska ha txibākī txakabuwakanikiki. Haska inū, huni betsa Balaão pei binū ika kemui ini keskariakī Deusū bai kayatapia benui yusīnā betsabu paranānā peiwē kemuriakanikiki. Haska inū, huni betsa Corā Deusū yunua danāi benuni keskai ha paranānāmisbu habu mawariai pemashākanikiki. <sup>12</sup>Haska inū, mā Jesus txibaību itxatā duanamekī mā piaibū ha paranānāmisbu dakei hawa dateama matube naxui itā pike bestikī tsua duawama benimanikapaikī matu dakewamisbuki. Habu mekenikabia ibubis besti hawē yura xinaī mekemisbuki. Habū yusīanā, nai kuī hushupa nuyabainaya ui huama mai metxawaisma keskai habu hātchahairakī yurabu merabewakī kuxipa waisbumariki. Ha inū, hanu ni bimiyamisbutiā hi betsa betsapa bimibiamiskē habu hātchāwaību nīkakī hawē merabewati hi bimiuma shanaxina betsea keskai paranānāmisbū tsua merabewaisbumaki. <sup>13</sup>Ha inū, iānēwā niwē betxuruākī tūkash akī kesha anu bakush henebaīmis keskakī habū txakabuwai paranānākī dake pae shabakabi henebainaibu dasibibū uītirubuki. Ha inū, bixi hawē bai ana tanabainama keskai ha paranānāmisbu unānumas buaibu ana tsuā txibātirubumaki. Haskawē taeshū hanu mexuhaira Deusū hatu washuni anu hanu hatu nitxītā kupihairashanikiki, niti akamarā.

<sup>14</sup>Ha dukū Adāowē pakea setewē hawē baba Enoquetiā ha yurabu txakabukiri bebūkiri Deus hātchashūkī yuikī: “Uīa. Yavé Deus huirā, hawē nai tsuma mirima tsuā hati tanatirumaya hushū <sup>15</sup>yurabu dasibi hatu unāti wakī habuā txakabu betsa betsapa amisbu inū hatū hātcha pemawē Deuskiri yuimisbu Deusū hatu kupishanikiki”, ani <sup>16</sup>habias keska menei

hawara tibi abuama ha iki yuānanaī hawarawē ibubis hawenas benai benimanū ika hatū kemu pae besti txibaī inū keī mia akaitū besu wakī dasibibu hatu binumakī maemaikiki, hatu kēwāmairā.

**Ikūwākī kaneaibu nui paewē hatu merabewatikiaki, na hātcharā**

<sup>17</sup>Hakia ē betsabu inū ē puibuū, ē matuwē nuiairā, nukū Shanē Ibu Jesus Cristō hawē kuxipayabu hatu yunua haska habū matu yusīni ana matu xināmanū xinaīrakāwē. <sup>18</sup>Hawē tsumabū matu yusīki: “Txanima hanu bari hawē henei ma kemaya yurabu hiwe txakashū ibubis txakabu xinākī matukiri kashekenāshākanikiki”, haska xinākī matu yuiniburā, <sup>19</sup>txanima na habiatia ha yusīnānaī parananaī kashekenaībū Deus xināma ibubis hatū kemuti xinā txibākī ikūwaību tari pashkakī Deusū Yushūma wakī hatu akanikiki.

<sup>20</sup>Ē betsabu inū ē puibuū, tsuabura ē matuwē nuiairā, matu yuinū nīkakāwē. Ikūhairawai ana kuxipanamei hawē besti mestētā txītuāma meribi hiweshūyukī Deusū Yushī Papatū matu xināmākī yuimaya Deusbe hātchai hawē kuxipawē dayuikubaīkāwē. <sup>21</sup>Haska inū, Deus matuwē nuimis inū matu putaisma unaī Jesus Cristo hanu hushanai mā manaiwē taea nukū Shanē Ibu Jesus Cristo nukuwē dabanā ikī hiwekuīa ikibi ika nuku ināshanikiki.

<sup>22</sup>Jesus Cristo ikūwābiai teabu hatuwē nuikī merabewakubaīkāwē, xinā dabewaiburā. <sup>23</sup>Mā habuwē nuikī merabewakatsis ikairā, hatū kupiti ma kemawabu txi anu ma kemai keskabu menā hatu neshea keska warikāwē. Betsabu habū txakabu mā abuamabia matūmebi meketā hatū hiwea beya husiama danābiakī hau Jesus Cristo ikūwanūbū hatu merabewakubaīkāwē.

<sup>24-25</sup>Nukū Epa Deus ha besti nukū merabenā yushī dasibi kuxipa hayatū matu kuxipa wakī matū xinā txakabū ana matu kanematiru nemashūkubainaya hawē bake shanē ibuhaira huaya yura dasibibu unākī hatu kupiaitiā maturi ha bebū hawa txakabu mā hayama hawē besuuri matu nitxītā benima pae matu ināyā mā benimahairashanaii. Haskakē nukū Shanē Ibu Jesus Cristowē taeshū Epa Deus duapa pepa inū, hatū besti kuxipa binu keyua inū, yunuti kuxipa pae hayahaira iki taeni inū natiā haya inū ipashanai haya kēwākubainākāwē, heneamarā. Haskakirā.

Hatiki, ē hātcharā.

Judas